

Ny Valosoa sy hadihady

Politikam-pitondrana

Tsy voaaro ary tsy voatsinjo ny hoavin'ny zaza malagasy

Lesoka lehibe amin'ny fitantanam-pirenena entin'izao fitondrana Rajoelina izao ny seha-panabeazana. Tsy misy ary tsy hita mihitsy izay politika mazava, momba ny seha-panabeazana ny tanora malagasy nataony hatramin'izay nahateo amin'ny fitondrana azy. Ny tsikaritra, dia rehefa amin'ny fotoana iray manokana misy hetsika tanora amin'ny sehatra samihafa, ka tonga eo na misy ifandraisany amin'izy ireo ny mpitondra, indrindra ny filohan'ny Repoblika, dia izay vao mody be resaka sy programa momba azy. Dia mivalona any indray ary adino izy ireo aorian'izay fihaonana izay. Toy izay ihany koa ny momba ireo zaza malagasy. Misy ny hetsika atao rehefa volana jona iadiana na anentanana ny zon'ny ankizy, dia misehoseho sy miteny eo ny mpisehatra amin'izany, dia aorian'izay mangina. Nisy fidiran'ny mpianatra tamin'ny volana septambra lasa iny, dia mody misehoseho eo ny fitondrana milaza ho manao izay hampidirana ny kilonga na ireo zatovo ihany any an-tsekoly. Mody natao ny fanampiana ara-pitaovana ny mpianatra tamin'ny sekoly santsasany, dia hatreo ihany. Vao nanomboka andro vitsy monja anefa dia niharihary ireo zaza tavela tsy tafiditra an-tsekoly noho ny antony samihafa, fa ny voalohany amin'izany dia ny fahasahiranana na ny fahantrana lalina manjo ireo ray aman-dreniny. Manginy fotsiny ny fahitana ireo zaza mirenirenay eny an-

dalàmbe rehetra eny sy mangataka isan'andro. Tsy mijery ary tsy misy miteny ary tsy ahitan-teny momba izany izao fitondrana be eboebo izao. Tsy misy miady ho azy ireo momba izany, ary miharihary tsara ny fahabangana lehibe eo politikam-pirenena. Izy ireo anefa no anisan'ny andry lehibe iankinan'ny hoavin'ity firenena ity any aoriana.

Eo amin'ny lafiny fitaizana ara-batana na ny ara-patanjahantena ho an'ny zaza, ny zatovo ary ny tanora malagasy. Raha tsy hilaza afa-tsy ny eny amin'ny sehatry ny sekoly fotsiny, dia miharihary tsy takon'afenina ny fahabangana. Tsy re intsony, ohatra, na tsy malaza intsony, hafa ny taloha, ny momba ny "sport scolaire". Nisy akony lehibe teo amin'ny toetsain'izy ireo anefa izany, ary azo porofoina izany ho an'ireo voataiza amin'izany fahiny. Tsy atao hahagaga raha tsy voafehy, ka hirona amin'ny zavatra hafa ny ankizy. Anisan'izany ny tranga amin'ny fiaboroboan'ny fidrohana zava-mahadomelina mamely ny maro amin'izy ireny, ary misy ireo efa namoy ny ainy vokatra ny daozy tafahoatra. Sady tsy voaaro no tsy voatsinjo ny hoavin'ireo zanak'ity firenena ity. Alefa migorodana fotsiny manaraka izay fironana samihafa araka izay misy eo na eto an-toerana na any ivelany, dia samy manao izay saim-pantany sy heveriny hatafavoahany amin'ny fiainany eo ny rehetra.

Sôh'son

Kôlônely Rabe Jules, KMMR Toliara

Tsy mihemotra amin'ny ramatahoran'ny mpitondra

Anaovan'ny fitondrana Rajoelina ramatahora koa amin'izao fotoana ny kôlônely Rabe Jules, mpitarika ny KMMR any Toliara. Rakotra mpitandro filaminana nanao « tenue civile » nanoloana ny tranon'i kôlônely Rabe Jules, raha namory ny Jeunes KMMR distrikan'i Toliara izy ny sabotsy teo, naka sary ny zava-nitranga teo izy ireo, hatramin'ny bus nitondra ny mpianatry ny Collège Rabe Jules, avy nanao reboisement sy excursion dia nalaina sary avokoa nefa tsy misy idiran'ny politika.

Rehefa nanontaniana izy ireo dia nilaza, fa manatanteraka ny baiko avy amin'ny lehibeny. Aminay ilay izy hoy ny KMMR Toliara dia fampihoro-roana sy fihantsiana, satria ny « renseignements » dia tsy tahaka ireny ny fakana azy. Nanambara ny kôlônely fa : « izao fotsiny, matao aho manohana an'i Marc Ravalomanana ary matoa nampahafantariko ny fisian'ny fivoriana ao an-tranoko dia vonona hijoro aho ary sahy satria miezaka tsy handika lalàna, tsy ny intimidation na fampitahoranareo no hampihemotra ahy, na hampihemotra ny olona manaraka ahy, tsy afeniko ny ahy ary ijoroako satria zoko izany, ka ho vizana ianareo satria ambarako anareo eto fa intelo isa-kerinandro iza-hay KMMR no mivory. Isanandro colonel RABE Jules, no mandray olona, ka tsara raha andefasanareo mpitandro filaminana foana eny amiko. Ny mampalahelo manjaky ny insécurité eto Toliara, tsy hitan'ny renseignements nareo zao ny mpanao ratsy, fa ny politique izay ataoko ary tsy afeniko, fa abaribariko ro manahira anareo. »

Stefa

RANDRANA SENDIKALY

Famonoana ny mpiasa ny karama farany ambany hahena ho 217000 Ar


Tsy azo ekena ny fikasan'ny fitondram-panjakana hamerina indray ny karama faran'ny ambany, ho an'ny mpiasa amin'ny sehatra tsy miankina, ho lasa 217000 Ar raha toa ka 250 000 Ar izany teo aloha, hoy ny Randrana Sendikaly. Nilaza Andriamatoa Rakotomanga Barson Sekretera jeneralin'ny Randrana Sendikaly, fa namoaka didim-pitondrana ny Ministeran'ny asa sy ny Ministeran'ny vola ary ny Ministeran'ny varotra sy ny Industria, nandritra ny fivoriana « Interministeriel » nataon'ireo farany, fa hifarana

amin'ny volana desambra 2022 ho avy izao ny fampiharana ny karama 250000 Ar. Nilaza ny Sekreteran'ny Randrana sendikaly, fa araka ny fehezan-dalàna mifehy ny asa ao amin'ny andininy faha11 dia tsy azo atao ny mampihena ny karaman'ny mpiasa ary efa nanao sonia hanaja sy hametraka asa mendrika ny fitondram-panjakana, amin'ny alalan'ny fifanarahana iraisam-pirenena momba ny asa. Nana-mafy izy fa tsy misy fanapahan-kevitra noraisina tamin'ny alalan'ny « Arreté », ka hanafoana ny

didim-pitondrana navoakan'ny filoham-pirenena amin'ny alalan'ny « Décret », izay nametraka ny karaman'ny mpiasa faran'ny ambany ho 250000 Ar ary hitory eny amin'ny « Conseil d'Etat » ny Randrana sendikaly, mba hanafoana an'ity fanapahan-kevitra ity, satria mamono ny mpiasa eo amin'ny sehatra tsy miankina ity fanapahan-kevitra ity. Nanatanteraka diabe ho fanamarihana ny andro iraisam-pirenena ho an'ny asa mendrika, izy antoklazaina isakany 07 Oktobra ny Randrana sendikaly ny Zoma ma-

raina teo ary nitondra sora-baventy, sy nitaky ny famoahana ny mpisehatra sendikaly izay nampidirina am-ponja nohon'ny asa sendikaly ireto farany. Takian'ny Randrana Sendikaly ny fisian'ny asa mendrika eto Madagaskara, ao anatin'izany ny fanajana ny lalàn'ny asa (Fehezan-dalàna mifehy ny asa), ny fanavaozana ny fiahiana ara-tsosialy ho an'ny mpiasa, ny fivoizana ny fifampiresahana eo amin'ny mpiasa sy ny mpampiasa amin'ny alalan'ny « Dialogue sociale ».

Razakambelo Franck



Ny kôlônely Rabe Jules.

TONONKALO

Ny loko laoranjy

Ny loko laoranjy dia mila ovàna,
Fa efa tsy mety amin'ny eto an-tanàna.
Toa loko madera manaitra ny maso,
Kanefa dia lokon'iretsy malaso !

Ny loko laoranjy dia mila ovàna,
Fa mampitsilopy ny fanantenana.
Raha vao ny laoranjy no hoe iakanjoana,
Dia efa miomàna fa ho resy foana .

Ny loko laoranjy dia efa fanary.
Raha vao hoe laoranjy dia resy ny tary,
Ka dinidiniho f'efa mampidi-doza
Ity `lay sokajiana ho lokon'ny foza !

Ny loko laoranjy tsy hampisy "korazy",
Fa resy daholo izay misalotra azy.
Toa tena mba loko madera jerena
Kanefa hay dia "lokon'ny faharesena" !

TSIMIMALO (10-10-22)



Ny diabe nataon'ny Randrana Sendikaly.